

# Ti konja tjóa

CUENTO ORIGINAL

A stylized, cursive signature logo consisting of the letters 'Tmh' in a fluid, handwritten style.

[www.ngivaatzingo.net](http://www.ngivaatzingo.net)  
[Atzingo.pue@outlook.com](mailto:Atzingo.pue@outlook.com)



Injko ñao mé injko chojni kuek'in  
Jaro, mé k'uechonta ch'an injko konia  
tjóa kuek'in Blankis.

Ti ch'in Blankis me injko konia  
imá nohe la ko chrakuehña ninkehó  
iko la jína t'ayakohen ch'an ti ndoe  
ìnché ch'an.

Ndá injko ñao la ti ìnché ch'an me sákjuí ókje chjasin  
sákjuik'enā nkehe, kjáncho ti naxā sátjihya ch'an la ndache  
ch'an ti ch'in Blankis:

—Janhan la sátsjia íjnko chjasin tsikakjaá ti nkehe  
ticháxina méxra ntihó titoha t'ayakohen jina ti nchia



la ko kain nkehe —ichro ti ch'in Jaro ndá sákjui ch'an.

Nda ti ch'in Blankis la kjuinchexiteya ch'an la kuítóenta ch'an ti nchia, kjáncho ti ó k'uátsinka jnko it'ò hora la kuíhi ch'an kovékjan jnko nkehe ti nonte nchia la kjaxón, kjaxón sakjuitsjehe ch'an nkehe tiha, ndá ti ó kochjina ch'an la k'uaxrje kuinké ijnko kolótse. La ti ó k'uikon ch'in Blankis la k'uinkíte ch'an ti kolótse, sákjuiko ch'an hasta chjinaxón nteje ndá ikjan ch'an ndoe ch'an inaá.



Ti ó kjuíji ch'an ndoe ch'an la kjuak'etsínka ch'an kòk'éhe ch'án, xrínahña kuíhin ch'an íjnko nkehe kóvekjan nkaxehen chjate la k'uinkatjen ch'an sákuitsjehe ch'an la k'uíkon ch'an íjnko konchíxin k'uaxrjexín ti chjate la tjian sákjuíchréhe ch'an tsjánkatēe ch'an, kjáncho ti konchíxin la ndachro:

—Nchechiéhñani kixin tijie kjínie —ichro ch'an.

Ndá ti ch'in Blankis la ndáchro:

—Sátjixian ntihi, ti nahi la sinieheni ti jaha —ichro ch'an.



Ndá ti konchíxin á kuitekakohña ch'an ti nkehe ichro ti ch'in Blankis, la ándosén ch'an tjeñe ch'an, kjánchó ti ch'in Blankis la kjuixin chríka itsé ch'an ti konchíxin.

Nda ti konchíxin la chríka chronóa ndachro:

—Titoheni sátsjini tjinkakohñani its'eni —ichro ti konchíxin a tsjánka chronóa.

Ndá ti ch'in Blankis la ndáchro:

—Tsitohá sátsjia la í kjanhña ntihi ti nahi la í ts'atjándahya —ichro ch'an.



La xikaha ti konchixin la chrákon la kuinká ch'an sákjui ch'an ikjín la í kjahña ch'an ntiha.

Ti ó kjuixin k'uatjanta ch'an ti konchixin la sákjui ch'an ti t'inkachjina kochíka sákjuitsjehe ch'an á jina tjejó va, kjánchó kuíhin ch'an kixin sitjité kain ti kochíka chrakon va ndá k'uíxehen ch'an ti tinkáchjina va la k'uíkon ch'an ijnko kontóji tjet'i ti koja tsikaán ti kochíka, ndá ch'in Blankis la kójnā ch'an tsjánkateē ch'an ti kontóji ndá ti kontóji la imá chrákon la tinká ch'an k'uaxrjexin ch'an ntiha kixin íma jjehe ti ch'in Blankis chréhe ti jehe ch'an.



Ndá ti ch'in Blankis ti ó kjuixin k'uinkite ch'an ti kontóji la sákjui ch'an ti síin ino, sákjuitsjehe ch'an kixin á kohya chojni teé ti itin tsik'ona, xrínahña ti ó kjuiji ch'an chrík'a ti ino, la k'uikon ch'an ijnko koxrála tsjenie jnko itin la ti ch'in Blankis la kojna ch'an kjáncho ti koxrála la ndáchro ch'an:

—¿Nkekuènté tójnaa? Jeheni la chrakuehñani ti jaha ti sich'ehéni ichrén nkehe la chontani itsjé nkexro t'itoni itsji tsjinkitsa —Ichro ch'an.

Kjáncho ch'in Blankis la kuitekakohña ch'an ti nkehe ichro ti koxrála, la kójna ch'an sakjuícréhe ch'an ti koxrála, ndá ti koxrála la kuinka va, la ko kuinkava la k'uixehen va jnko toye itjen chjinaxón ntiha ndá ntahó kuitøhe ti ch'in



Blankis la ninkaon ch'an kixin kjuachanhya ch'an itsé ch'an ti koxrála.



Kjáncho ti ó sákjui ti ch'in Blankis la ti koxrála la k'uaxrjexín ch'an ti tóye la sákjuikjeya ch'an ti kontákjan, ti nkexro t'iton ch'an. Ndá ti ó k'uitja ch'an ti kontákjan la níxjehe ch'an ndáchro ch'an:

—Ó kjuixin k'óxrjeni tjejáni ti jaha.

Ndá ti kontákjan la ndachro:

—¿Nkekuènte xritjéyani? ¿á tjinkavan nkojin nkehe ni?

Ndá ti koxrála la ndachro:

—Jeen, tjinkaoni tsjinkitsa sinchechrákoni ijnko konia kixin sínchechrácohña kain ti sin kíchoni tjeyá nkehe sinie.

Ndá ti kontákjan la ndachro:

—Nchóxón, kjáncho ti ch'in Blankis la chrakuehña ninkehó iko, ndá jeheni la intsíni la xrahya ts'oña ch'an ti jeheni —Ichro ti kontákjan.

Ndá ti koxrála la ndáchro:

—Chaxín tiha, kjáncho jaha la chonta jnko nkehe chrakohen kain iko.

Nda ti kontákjan la ndáchro:

—Ah jeen, ti xikaha la chronka nketín itjen ti konia la

ko chronka nketín itjen ijnko itjō chinaxón ntiha, la nchenkojié kain ti iko tsikjinchechrakon ch'an —ichro ti kontákjan.

Ndá xikaha ti koxrála la chronka kain ti nkehe kjuanchanki ti kontákjan landá sákjuikjeyá ch'an kain ti iko tsikjinchechrákon ti ch'in Blankis a.



Ndá ti kontákjan la kuakja ntia sákjuikjeya ti ch'in Blankis, ti ó kjuiji ch'an ntiha la nkatjenta ch'an kuenté ti nchia la kohya ch'in Blankis, sákjui ch'an ti t'ikachjina kochíka la kohya.

Ndá sákjui ch'an ti chrik'a ino la k'uikon ch'a itjen ti

ch'in Blankis, ndá ti ó k'uikon ch'an la kuakjijin ch'an ijnko itin la kjuak'e ch'an kjonie, nda ti ó k'uaya ti ch'in Blankis la k'uikon kixin ntiha itjen ti kontákján tjenie itin la koninkaon ch'an, kójna ch'an la ndáche ch'an ti kontákján kixin sátsjixin ntiha kjáncho ti kontákján la ndachro:

—Jeén sátsjini, kjáncho chréhya nótoni, ti nahi la chontani jnko nkehe tsikjaniani la tsoxríahña —ichro ch'an.



Ndá sákjui ch'an la k'uíxehen ch'an ti tóye la sákjuíko ch'an ti itin tjenie ch'an kjaxin, ndá ti ch'in Blankis la imá koninkaon ch'an, la


tinka ch'an sákjui ch'an ti itjen ti tóye k'uixehen ti kontákjan la ninkaon ch'an takjenkehe ch'an ntiha, xrínahña kjuixin soàte ti kontakján ti jehe ch'an kósiñehe ch'an.



Ndá ti tóye a la k'uaxrjexín kain ti íso iko kjuinchechrákon ch'an la k'uinkíte sin ch'an.

Ndá jehe ch'an la chrákon ch'an la síxranka ch'an kuinka ch'an.

Nóa ch'in Blankis imá chrákon ch'an la í  
tjenkayaxihña ch'an sich'e ch'an xikaha inaá.



Ndá ti ó tsojin la ó ikjan ti ch'in Jaro la konohe ch'an kehe tsikohen kixin ti Blankis la imá ixran ch'an la ndachro:

—¿Nkekuènté imá ixran jaha? ¿xá nkehe kjuich'e? Jehó kuétóahan kixin ts'ayakohen ti nchia la ko ti íso nkehe, tsotsjehe a tsihya nkojin chojni, kjáncho kain ti íso iko la nchóxon ixri va tjeya va nkehe inie va —ichro ch'an.

Ndá ti ch'in Blankis la konohe ch'an kixin nduahya kjuich'e ch'an la kósuéhe ch'an.

Ndá xikaha ti ch'in Jaro sákjuiko ch'an ti ch'in Blankis kixin ts'onti. Mé xikaha ikjuí ti cuento kuènte ch'in Blankis.

**OTJEN**

